

Itziar Espartza | UNED-Bergara Ikastetxe Elkartuko zuzendaria

# "Ikasketak egiteko askok behar dute UNEDen erritmo pertsonalizatua"

Atzo, eguena, hasi zituzten UNED-Bergara ikastetxearen 40. urteurreneko ekitaldiak

UBANE MADERA | BERGARA

Itziar Espartza Leibar (Bilbo-Iruñea, 1962) Zuzenbide Prozesalean katedraduna da EHU eta UNED-Bergara Ikastetxe Elkartuko zuzendaria 2010etik.

**1976an sinatu zen Bergaran UNEDen ikastetxe elkartua bideratzeko erabakia, 200 urte lehenago, 1776tik, Goi Mailako Ikasketak eskaintzeko legeak onespenua zuten Errege Seminarioan bertan. Bergaran goi mailako ikasketarako ibilbidea egin izana erabakigarria izan zen UNEDen eskaintza bertan kokatzeko?**

Bergaran aurkitu eta sintetizatu zuten wolframioa duela pare bat mende; nazioarteko eta lehen mailako aurkikuntza izan zen. Beraz, goi mailako ikerketa zentroa zegoen bertan garai hartan. Pentsatzen dut orduan alkate zen Jose Luis Elkorok ikusiko zuela aukera Bergarako tradizioari jarraipena emateko eta estatuan bi urte lehenago sortu zen UNED Bergaran ere jartzeko. Bergararik kanpo, bereziki kimikariek eta zientzietan ikerlari eta irakasleek ere oso ondo dakite Bergarako kontu hori, eta planteatu zenean UNED Bergaran egitea, ilusio handia sortu zuen, Bergara, aurkikuntza egin zeneko lekua, ezagutzeko aukera emango zuelako. Bergaran bazegoen elkarte ilustratu bat, eta haien ondorengoek tradizioa babestu egin zuten eta aukera ikusi zutenean hura gauzatzeko baliabideak jarri zituzten.

**Arrakastatsuak izan ziren lehen pau-**

**soak, oker ez banabil, ehunka ikaslerekin hasieratik, ezta?**

Bai; balio izan zuen hainbat belaraldik euren prestakuntza egin ahal izateko. Garrantzi estrategikoa izan zuen UNED-Bergarak.

**Goraipatu izan da UNEDen eskaintza malguak ahalbidetu izan duela emakumei, bereziki, ikasketak egiteko aukera zabaldu izana, bereziki 70-80ko hamarkada hartan...**

Zalantzarik gabe. Eta edonori. Izan ere, unibertsitate presentzialen erritmoa jarraitzeko norberak baditu urte bakoitzeko 1.600-1.800 ordu, ez dago arazorik; baina edozein baldintza, beste lan edo arduraren baldin bada, ezin da unibertsitate presentzialen erritmoa jarraitu; beraz, emakume nahiz gizon, erraztasun handiak ematen dizkio UNEDek ezartzen dituen erritmoak, pertsonalizatuak direlako. Adibidez, lanean dagoen pertsona bat ezin da joan 1.600-1.800 ordutan fakultate batera, eta, presarik izan ezean, UNEDen bitartez, aukera daiteke urte akademiko bakoitzeko zenbat ikasgai nahi diren; hori unibertsitate presentzialen ezin da egin. Gu haien osagarri gara. Horregatik esaten dut gure lana zerbitzu soziala dela; bestela, pertsona askok ezingo lukete edo oso zaila izango lukete goi mailako ikasketak egitea.

**Zein da UNED-Bergara Ikastetxe Elkartuaren erretratu zifratu?**

2.000 ikasle ikasketak ofizialetan eta propioetan beste 1.000 inguru.



Itziar Espartza Leibar. | GIPUZKOAKO DIPUTAZIOA

**Ezjakintasunetik abiatuta, hori asko da, ezta?**

Bai, eta erkidegoan 7.000 ikasle dira. Adibidez, Nafarroan bi zentro daude, Iruñean eta Tuteran, eta Nafarroan 4.000 bat ikasle dira, eta Nafarroak Gipuzkoak baino populazio apur bat txikiagoa du.

**"UNEDen egiten den lana zerbitzu soziala da, eta balioan jarri behar da"**

Eta Gipuzkoan, gainera, bost unibertsitate ditugu.

**Araututako ikasketak eskaintzeaz gain, UNEDen ezaugarrietako bat bada ez araututako ikasketak eskaintzea. Zela eragiten du horrek unibertsitatearen eskaintza?**

Estatuan guztiok ematen ditugu araututako ikasketak; gero, norberak edo ahal duenak ingurura egokitzen den eskaintza propioa egiten dugu. Guk hori aspaldi egin dugu eta indartu egin nahi dugu; horretarako Ikasketak Propioetarako Zentroa jarri dugu abian aurrean, bigarren zutabe hori irmotu nahi dugulako; izan ere, horri esker egokitzen gara gizartearen beharretara.

**Zentzu horretan, UNED-Bergara zabaldu zenean iragarri zen egon zitekeela eskaintza kultural euskalduna. Ze punturaino izan zen horrela? Idazle Eskola hor egotea, adibidez, horren ondorio da?**

Bai. Eta hori ere potentziatu nahi dugu. Uztailean egin genuen Tere Irastortzarekin, Idazle Eskolako zuzendariarekin, harremana hori egiteko; bestalde, orain hitzaldi ziklo bat prestatu dugu, horietako hainbat euskaraz izango dira eta horrekin hartuko dugu tenperatura ikusteko ze punturaino dagoen

interesa, eta, horren arabera, aurrera jarraitzeko.

**Eta ez araututako zuen eskaintza, adibidez, igartzen da euskararen presentzia handitu egin dela?**

Bai. Guk normaltasunez erabiltzen dugu euskara UNEDeko lanetan eta saiatzen gara produktu akademikoak euskaraz egiten. Bestalde, Eusko Jaurilaritzarekin landu izan dugu gaia (gainera, uztailetik Jaurilaritza UNEDeko Errektore Kontseiluko kide ere bada), eta hark badaki UNED Bergaran elebiduntasun urratsa egiteko potentziala dagoela. Gure aldetik prest gaude egiteko, eta gainontzeko agenteek urrats hori egiten badute, gai izango gara. Guretzat, estrategikoa da.

**40 urteko ibilbidea eginda, zeintzuk dira epe motzerako erronkak?**

Aurtengo ikasturtea abian jarri, planifikatutakoa gauzatu, eta horren analisia egin. Prestatzen hasi gara ikasturte berriaren inaugurazioa, seguru aski urriaren 21ean izango da. Hor nahi dugu parte hartzea modu nabarmen batean orduko alkate Jose Luis Elkorok, orduko lehen zuzendaria Jesus Arpal eta baita ere, Manolo Cainzos, sortzaileetako bat. Protagonismo berezia eman nahi diegu.



Olano diputatu nagusia eta Espartza, martitzenean. | GFA

## 40 urteak mamitsu ospatuko dituzte

Atzo, eguena, hasi zituen UNED-Bergarak 40. urteurreneko ekitaldiak Bergaran. Gaur, berriz, Arantzazun dute hitzordua, Von Humboldt elkartearen kongresuaren lehen jarduneko: "Etorriko dira 100 irakasle, katedradun eta ikerlari lehen mailakoak, baita ere Alemaniatik, Espainiako elkartearen sorburuan dagoen Alexander Von Humboldt fundazio publikotik (...)". Martitzenean iragarri zuten hori Gipuzkoako diputazioan Markel Olano diputatu nagusiak eta Itziar Espartzak, UNEDeko zuzendariak; jakinarazi zuten, baita ere, urtea amaitu bitartean konferentzia-zikloa egingo duela UNED-Bergarak; hasteko, irailaren 22an Bergaran Blanca Ganboak herentzien lege berriari buruz jardungo du, 19:00etan, UNEDen. Hori iragartzeaz bat, Olanok eta Espartzak balioan jarri zuten uztailean UNEDek Bergarako Errege Mintegian segitzeko erdietsitako akordioa.